



BILTEN

OPĆINE SREBRENİK



CERTIFIKAT ISO 9001:2000
BROJ: 155865



IZDAJE: OPĆINA SREBRENİK • BROJ: 35 • MJESEC: JULI/SRPANJ 2011. • BILTEN JE BESPLATAN • TIRAŽ 500



Foto: Svjetlan Bešić

SADRŽAJ

- 2 Obilježene 19.godišnjice ABiH i TO Srebrenik
- 3 29. sjednica OV-a Srebrenik
- 4 30. i 31. sjednica OV-a
- 5 Obilježen 9.maj;
Održana Skupština UDB-a
- 6 Prijemi za Dan općine; Dani otpora općine Srebrenik 2011
- 7 Novi asfaltni putevi u G. Tinji i od NN Luka do Čifluka
- 8 Proslava 21. juna, Dana općine Srebrenik
- 9 Proslava 21. juna, Dana općine Srebrenik
- 10 Otvorenje fabrike za reciklažu otpada u Špionici
- 11 Nova pješačka staza i igralište u N.N. Sječe; Vertikalna turistička signalizacija
- 12 Posjete premijera Vlade TK-a i predsjednika FBiH Srebreniku
- 13 Likovna kolonija „Srebrenik 2011“
- 14 Promocije knjiga u Srebreniku i Hrvatskoj
- 15 Nastup BZK Preporod i HKD Napredak u Srebreniku; Manifestacija „Putevi spasa“
- 16 Posjeta studenata iz Malezije; Volonteri krenuli sa radom
- 17 Okrugli sto: „Spomenici-juče, danas, sutra“; Spomen obilježje u Čagama
- 18 Udruženje privrednika Srebrenik na sajmu „Sapo 2011“; In memoriam: Samed Džanić
- 19 Peti susreti staničara; Kotličijada „Srebrenik 2011“
- 20 Školske aktivnosti i takmičenja
- 21 Najbolje kućno i školsko dvorište te poslovni krug
- 22 Proslava mature MSŠ Srebrenik; Naši osnovci na Kids festivalu
- 23 Radničke sportske igre; Uspjeh karatista KK Srebrenik; Veliki uspjeh PS Srebrenik
- 24 Sportske aktivnosti



Položeni su vijenci sa cvijećem na spomen-obilježje za Dan Armije BiH

U Srebreniku obilježena 19. godišnjica ABiH i TO Srebrenik

Dana 14.04.2011.g u Srebreniku je obilježena 19. godišnjica formiranja Armije BiH. Predstavnici izvršne i zakonodavne vlasti Općine Srebrenik, predstavnici boračkih organizacija, porodica šehida, bivši borci kao i ostali građani, prisjetili su se vrlo važnih dana za opstojnost BiH i njenih naroda. Položeni su vijenci sa cvijećem na Centralno spomen-obilježje na trgu Alije Izetbegovića, i na spomen-kosturnici pripadnicima NOR-a (1941-1945), nakon čega je održana svečana akademija u povodu 19-te godišnjice formiranja ABiH. Ovom prilikom gostima se obratio ratni komandant 211. oslobodilačke brigade Ibrahim Salihović, koji je kazao: -U svijetu je Armija BiH, u ratnim vremenima, predstavljena kao „čudo bosanskog otpora“, s obzirom da smo nespremni uspjeli da se odbranimo od, po mnogima, pete vojne sile u Evropi, čijih je, od ukupno 17, čak 11 korpusa bila stacionirano u BiH. JNA zadojena četničkom ideologijom željela je da potpuno okupira BiH, a njene narode koji nisu Srbi odvede u nestanak, prije svega bošnjački narod. Tada su prvi otpor pružili „Patriotska liga“, „Teritorijalna odbrana“, „HVO“, „Zelene beretke“...., koje su kasnije uglavnom sve dovedene pod jednu, združenu komandu Armije BiH i to 15. aprila 1992. godine, zbog čega smo i dužni vječno obilježavati ovaj dan, kazao je Salihović. Na sličan način je, nešto ranije, dana 9.4.2011.g, na svečan način, obilježeno i 19 godina od formiranja Teritorijalne odbrane općine Srebrenik. Proučili su fatihu i položili su vijence sa cvijećem predstavnici izvršne i zakonodavne vlasti te pripadnici raznih boračkih

organizacija sa područja općine Srebrenik i TK-a. Prisutnima se obratio i prvi komandant ove jedinice Fadil Vikalo, koji je kazao: - Kada se vratim 19 godina unazad, moram kazati kako su to bili presudni momenti za narode u BiH. U suštini je to bilo biti ili ne biti za sve nas. Što se tiče općine Srebrenik, u Tinji i Potpeću su već bile formirane srpske paravojne formacije, od kojih smo mi tražili da predaju oružje, ali su to oni odbili. Ključni momenat se desio kada su isti pucali na sanitet Hitne pomoći sa Orlove klisure, kom prilikom su



Detalj sa obilježavanja 19. godišnjice TO Srebrenik

ubili nedužne uposlenike DZ-a Srebrenik, što je nama bio znak da se radi o naoružanim vojnim snagama, kojima smo se morali suprostaviti, te smo u akciji, sa 19-tog na 20-ti april, i oslobodili ovo općinsko područje. Nakon toga još 2 mjeseca su trajale borbene akcije na okolnom području, sa kojih je prijetila konstantna opasnost po našu Općinu a posebno na putnu komunikaciju mag. put Tuzla-Orašje, dok se nije konačno oslobodila i Smoluća, da bi potom naša vojska konstantno nastavila braniti BiH na području općina Gradačac, Brčko, a po iskazanim potrebama, i drugih područja.

Izvještaj sa 29. sjednice OV-a Srebrenik

Na 29. sjednici Općinskog vijeća Srebrenik, zbog predloženog preobimnog Dnevnog reda, odlučeno je da se o Izvještajima većine javnih ustanova i preduzeća raspravlja na narednoj sjednici, s obzirom da njihovi izvještaji zaslužuju znatnu pažnju. Tako se samo raspravljalo o izvještajima JZU „Dom zdravlja“ i JU „Gradska apoteka“, koji su usvojeni uz konstatacije da se pokuša proširiti područje koje pokrivaju, te da se pokuša otvoriti nekoliko novih apoteka u mjesnih područjima. Dosta rasprave izazvao je Nacrt Programa zaštite okolice na području općine Srebrenik za 2011. godinu, gdje je načelnik Mehmed Bajrektarević istakao kako se radi na projektu angažovanja komunalnih redara a u saradnji sa Ministarstvom za prostorno uređenje i zaštitu okolice TK-a. Istaknut je i problem malog broja domaćinstava koja su obuhvaćena plaćanjem odvoza smeća, koji je ispod 50% i on bi se morao znatno povećati. Bilo je razgovora i o novoj deponiji, čija se lokacija mora pronaći do kraja godine, kao i o projektu toplifikacije, koji bi trebao da zaživi već ove godine. Bez mnogo rasprave usvojen je Izvještaj o radu općinskog, sada već bivšeg, načelnika Osmana Suljagića za 2010. godinu, kao i Nacrt odluke o organizaciji organa Uprave, gdje će doći do reorganizacije općinskih službi, sa posebnim akcentom na odjele za inspekcije, mlade, kulturu, razvoj „Starog grada“... Vijećnici su prihvatili razrješenje dosadašnjeg predsjednika Komisije za ravnopravnost spolova Damira Hodžića, umjesto kojeg je imenovana Semira Ahmetović, dok je umjesto preminulog Vahida Tursunovića za predsjednika Statutarno-pravne komisije imenovan Sanel



Ramiz Salihbašić-novi općinski pravobranilac

Imamović. Mnogo vremena vijećnici su na ovoj sjednici utrošili na imeno vanje Upravnog odbora JZU „Dom zdravlja“ Srebrenik, ali s obzirom da je bilo nekih nelogičnosti u Zakonu, odlučeno je da se ova tačka skine s Dnevnog reda, tako da će ovom zdravstvenom ustanovom i dalje upravljati dosadašnji Upravni odbor. Nakon što je dosadašnji općinski pravobranilac Imšir Škahić imenovan za ministra u Vladi TK, na ovo upražnjeno mjesto imenovan je Ramiz Salihbašić na četverogodišnji mandat. Bilo je i različitih mišljenja kada je u pitanju bio i Prijedlog Odluke o utvrđivanju broja općinskih priznanja, ali je na kraju ipak prihvaćeno da se za Dan općine, 21.juna dodijele tri Plakete, četiri Povelje, jedno priznanje za Humanistu godine, osam Zahvalnica te pet novčanih nagrada. Ostale tačke su usvojene bez većih rasprava i to Izvještaj o izvršenju budžeta za

2010. godinu, zatim Odluka o usvajanju godišnjeg obračuna budžeta Općine Srebrenik za 2010. g., zatim Elaborat o izvršenom popisu sredstava, Program mjera zdravstvene zaštite životinja za 2011. godinu, te njegovo provođenje i finansiranje, kao i Program zaštite i spašavanja ljudi i materijalnih dobara od prirodnih i drugih nesreća, te Informacija o stanju zaštite od požara i vatrogastva za 2010. godinu i Izvještaj o provođenju Općih izbora za 2010. godinu.



Detalj sa 29. sjednice OV-a Srebrenik

Izvještaj sa 30. sjednice OV-a Srebrenik

Na 30. sjednici Općinskog vijeća Srebrenik, koja je održana 18.05.2011.godine, predstavnici zakonodavne vlasti Općine, najoštrije su osudili vandalski čin sknavljenja spomen-obilježja u MZ Ježinac, koji se desio sa 8. na 9. maj, i u kojem je potpuno uništeno ovo obilježje, koje je napravljeno da podsjeća na najveće sinove Ježinca, koji su dali svoje živote za odbranu naše domovine. Zatraženo je od Policijske stanice Srebrenik da što prije otkrije i najooštrije kazni počionice, a toj inicijativi pridružili su se i predstavnici Udruženja boračkih organizacija. Ovom sjednicom dominirali su izvještaji javnih preduzeća i ustanova, koji su i usvojeni, a najviše se raspravljalo o radu za prošlu godinu u JU „Centar za socijalni rad“, zatim JP „9. septembar“ te JP „Vodovod i kanalizacija“. Kazano je kako je s viših nivoa vlasti ovom općinskom području do sada dodijeljeno blizu 4 miliona KM, za pomoć socijalno ugroženim kategorijama, ali se stiče dojam da ta sredstva ne dolaze u potpunosti onima kojima je i najpotrebnija. Iz tog razloga je predloženo da u narednom periodu načelnik Općine sa direktorom „Centra za socijalni rad“ posjeti sve mjesne zajednice, kako bi se izradila socijalna karta stanovništva te imao tačan uvid u pravu socijalnu sliku općine Srebrenik. Kada je u pitanju rad JP „9. septembar“, naglašeno je kako je od 12.000 domaćinstava samo 50% uključeno u organizovani odvoz otpada, što je ključni problem u teškom stanju ovoga preduzeća. Također je rečeno,

kako je Općinsko vijeće već ranije donijelo Odluku o obaveznom odvozu otpada, tako da će se u narednom periodu morati utvrditi „ko je zakazao u tom lancu“, kako bi obuhvat organizovanog odvoza otpada bio znatno veći. Podcrtan je i problem sa aktuelnom deponijom u Babunovićima, na koju će se odvoz otpada moći vršiti samo do kraja godine, što je jedan od najvećih problema za ovo općinsko područje. Iz preduzeća su kazali kako imaju i problema u radu pijaca, zelene i stočne, jer nemaju adekvatnu podršku kako da natjeraju prodavače da svoje usluge pružaju u krugu pijace a ne na ulicama i trotoarima. Veliku pažnju je izazvao i rad JP „Vodovod i kanalizacija“, koji potražuje blizu pola miliona maraka, ali i da uprkos tome ovo preduzeće posluje dosta dobro. S obzirom da se za rad Nadzornog odbora ovog preduzeća kao i ostalih ustanova izdvajaju značajna sredstva, rečeno je kako bi se svi upravni i nadzorni odbori trebali smanjiti na tri člana, kako bi što manje opterećavali rad javnih preduzeća i ustanova. Na ovoj sjednici bez rasprava usvojeni su izvještaji JU „Za odgoj i obrazovanje“, „Centra za kulturu i informisanje“, „Sportsko-rekreativnog centra“ te „Narodnog univerziteta“, dok su još usvojene informacije o gazdovanju lovnim područjem na Majevecu, te prijedlozi odluka o preuzimanju duga MZ Raptinica kao i izmjene i dopune odluke o obavljanju volonterskog rada osobama sa višom i visokom stručnom spremom.

Izvještaj sa 31. sjednice Općinskog vijeća Srebrenik

Na 31. sjednici OV-a Srebrenik, održanoj dana 09.06.2011.g., preovladavale su tačke dnevnog reda koje su odlučivale koliko će se općinskih priznanja i stimulatinih mjera dodijeliti za Dan općine, 21. juna. I dok su s jedne strane iznesena mišljenja kako priznanja nisu došla u prave ruke, s druge strane je bilo razmišljanja da jesu, zbog čega je zaključeno da se do naredne godine, izrade kvalitetniji kriteriji, kako se ne bi došlo u ovakvu situaciju. Najveća priznanja su Plakete i one će se dodijeliti Sakibu Ibračeviću, Policijskoj stanici Srebrenik, Mustafi Muratoviću te posthumno Hasanu Sarajliću. Također, dodijelit će se i četiri Povelje i to Nerminu Tursiću, dr. Ghassanu Husniu, Zlatanu Sitareviću te Ahmetu Fazliću, dok će ove godine priznanja za humaniste godine dobiti Hamzaliya Ibrić-Jata i Fahir Zukić-Butro. OV-e odlučilo je i da se dodijeli devet zahvalnica te sedam novčanih nagrada i to uglavnom mladim ljudima za postignute rezultate u oblasti obrazovanja i sporta. Vijećnici su prihvatili i da Općina preuzme dug MZ Gornji Moranjci prema d.o.o. „Fab“ iz Donje Lohinje u visini od 8.857,00 KM, dok je data saglasnost MZ Špionica Centar da se u Tutnjevcu izgradi šehidsko spomen-obilježje. Prihvaćena je i odluka o realizaciji projekta uvođenja dodatnih količina vode u vodovodne sisteme Ljenobuda i Kuga, kao i informacija o vodosnadbijevanju Tinje i Podorašja, kako bi ova područja riješila ovaj višegodišnji problem. Bez većih rasprava prihvaćeno je da se odobrena sredstva od Vlade TK u iznosu od 50.000,00 KM iskoriste za sufinansiranje lokalnog puta na dionici „OMV“ benzinska pumpa-Špionica Donja, a usvojen je i Program razvoja zaštite i spašavanja ljudi i materijalnih dobara za period 2011-2015. godina, kao i



Sa 31. sjednice OV-a

Program zaštite životne okoline u 2011.g. Prihvaćen je i Izvještaj o radu „Sportskog saveza“, sa željom da se u narednom periodu izdvoji još više sredstava za razvoj sporta, kao i informacija o socijalnom statusu korisnika boračko-invalidske zaštite u prošloj godini. U Informaciji o gazdovanju šumama istaknuto je kako je općina Srebrenik jedina u TK koja nema registrovanih minskih polja u šumama i da bi ova Općina trebala da ubire znatno veće prihode od eksploatacije šuma, dok je u Informaciji o stanju poljoprivrede načelnik Mehmed Bajrektarević kazao, da ova oblast mora biti okosnica i razvoja i upošljavanja, što bi se u narednom periodu moralo popraviti. Obzirom da je predlagač tj. općinski načelnik prije rasprave skinuo tačku dnevnog reda Prijedlog Odluke o organizaciji i djelokrugu organa uprave općine Srebrenik, to se o istoj nije ni raspravljalo.

Obilježen 9. maj, Dan pobjede nad fašizmom

Dan pobjede nad fašizmom, koji se u svijetu slavi 9. maja, svečano je obilježen i u Srebreniku. Prema protokolu prvo je položeno cvijeće na Centralno spomen-obilježje na Trgu Alije Izetbegovića, a zatim i na spomenik pripadnicima NOR-a, nakon čega je uslijedila svečana akademija. Prisutnima su se obratili predsjedavajući Općinskog vijeća Srebrenik Ibrahim Zukić i predjednik Udruženja antifašista Srebrenik Safet Ramić, dok je prigodni referat pročitao savjetnik načelnika Općine Nermin Tursić, a ton ovoj manifestaciji dali su i učenici „Mješovite srednje škole“ Srebrenik, koji su svojim recitatima podsjećali na ono što su fašisti radili tokom proteklih desetljeća.



Detalj sa svečane akademije

Gostima se obratio i prvi čovjek Općine Srebrenik Mehmed Bajrektarević, koji je između ostalog kazao: - Zlo fašizma teško može zauvijek biti poraženo, ali svakako da se protiv njega trebamo boriti na svakom koraku. Sve vjere, kulture i nacije trebaju da budu ujedinjene protiv ovog zla. Srebrenik ima tradiciju multietnič-

nosti i na svu sreću odupro je se da ne postane dio zločina u prošlim teškim vremenima, kada je bio na iskušenju, a što se to nije desilo, najveća zasluga pripada našim Sinovima Bosne, koji su u herojskoj i pravednoj borbi dali svoje živote, da mi danas možemo mirno da živimo u BiH, kazao je Bajrektarević.

Održana godišnja Skupština Udruženja demobilisanih boraca općine Srebrenik



Osmo Mujačević - novi predsjednik UDB-a Srebrenik

U prostorijama Vatrogasnog doma u Srebreniku održana je redovna godišnja Skupština Udruženja demobilisanih boraca općine Srebrenik, na kojoj su usvojeni izvještaj o radu za prošlu godinu i program aktivnosti za naredni period, te izabrano novo rukovodstvo. Kako je istakao dosadašnji predsjednik UDB-a Srebrenik Bajro Imširović, u proteklom periodu najviše pažnje je posvećivano poboljšanju materijalnog položaja 1.459 članova ove boračke organizacije. U saradnji s općinskim vlastima redovno je pružana i novčana pomoć za nabavku lijekova bolesnim

demobilisanim boracima, posebno oboljelim od PTSP-a, kao najugroženijoj kategoriji bivših boraca, a u cilju bržeg zapošljavanja demobilisanih boraca, organizirani su i besplatni kursevi engleskog jezika i informatike. U izbornom dijelu sjednice za predsjednika Skupštine UDB-a Srebrenik izabran je Ibrahim Dedić, dok je dužnost dopredsjednika Skupštine povjerena Mirsadu Hasanoviću. Za članove Predsjedništva ove boračke organizacije izabrani su Bajro Imširović, Mevludin Karić, Elvedin Ćudić, Nermin Jašarević, Esad Kurtić, Osmo Mujačević, Mehmed Poljaković, Zihir Suljić i Agan Husarić. Jendoglasnom odlukom članova Skupštine dužnost predsjednika UDB-a Srebrenik povjerena je Osmi Mujačeviću, a za dopredsjednika ove boračke organizacije izabran je Mevludin Karić.

Svečani prijem povodom Dana općine

U povodu 21. juna, Dana općine Srebrenik, općinski načelnik Mehmed Bajrektarević je 20.06.2011.g. upriličio svečani prijem za učenike generacije iz osam osnovnih škola i Mješovite srednje škole Srebrenik. Uputivši im iskrene čestitke na ostvarenom uspjehu u dosadašnjem školovanju



Detalj sa prijema učenika generacije i direktora OŠ-a sa područja naše Općine

načelnik Bajrektarević je najboljima uručio i prigodne novčane nagrade koje bi, kako je istakao, trebale predstavljati dodatni podstrek za ostvarivanje dobrih rezultata i u nastavku njihovog obrazovanja.

Učenici generacije školske 2010/2011 g.

- 1) **Amar Ibrić (Prva OŠ)**
- 2) **Džemal Jukić (Druga OŠ)**
- 3) **Elmira Zukić (OŠ Podorašje)**
- 4) **Derviša Selimović (OŠ Tinja)**
- 5) **Ahmed Mujanović (OŠ Špionica)**
- 6) **Sakib Salihbašić (OŠ Rapatnica)**
- 7) **Selma Osmanović (OŠ Duboki Potok)**
- 8) **Vikalo Samra (OŠ Sladna) i**
- 9) **Vikalo Safija (MŠŠ Srebrenik).**

U okviru obilježavanja Dana općine, načelnik Bajrektarević je u nastavku organizirao svečane prijeme i za dobitnike najviših ratnih priznanja i odlikovanja, učenike iz šehidskih porodica te predstavnike boračkih udruženja sa područja ove općine.

Dani otpora općine Srebrenik 2011

Dana 20.06.2011.g. , u Plavoj sali srebreničkog Doma kulture, održana je svečana proširena sjednica boračkih udruženja proisteklih iz proteklog rata u BiH, kojom su zaokružene brojne aktivnosti organizirane u sklopu manifestacije „Dani otpora općine Srebrenik 2011“. Riječ je o tradicionalnoj manifestaciji kojom općina Srebrenik i boračka udru-



Sa svečane sjednice povodom Dana otpora 2011

ženja na jednom mjestu obilježavaju sve značajnije datume iz proteklog rata na području ove općine. Na stanje u Srebreniku uoči agresije na BiH i na planove srpskih paravojnih formacija, u svom referatu podsjetio je Osmo Mujačević, predsjednik UDB-a Srebrenik. – „Predstavnici srpskog naroda općine Srebrenik imali su plan podijeliti ovu općinu i njen veći dio priključiti općini Lopare. U cilju realizacije tih planova, u Potpeću su se već od polovine 1991. godine mogla vidjeti uniformisana i do zuba naoružana lica, a iako je bio postignut veliki uspjeh u intenzivnim dogovorima o mirnom suživotu i izbjegavanju oružanog sukoba, ničim izazvane četničke formacije su 18. juna 1992. godine otvorile vatru na sanitetska vozila Doma zdravlja, koja su bila u humanoj misiji pružanja pomoći povrijeđenim i oboljelim licima“, istakao je Mujačević, naglasivši da je, zahvaljujući brznoj akciji jedinica Štaba TO Srebrenik, već 21. Juna 1992. godine osigurana komunikacija između Srebrenika i Tuzle i ponovo uspostavljena legalna vlast na cijelom području ove općine. Na svečanoj sjednici prikazan je i dokumentarni film grupe učenika Prve OŠ Srebrenik „Večeras ćemo za njih voljeti“ posvećen 228 šehida i poginulih boraca s područja ove općine, a uručena su i prigodna priznanja zaslužnim pojedincima. Za izuzetan doprinos u odbrani BiH, zlatne plakete boračkih organizacija posthumno



Najbolji sa takmičenja u streljaštvu

su dodijeljene Ahmetu Zahiroviću, Nazilu Jarčeviću i Mehi Dediću. Ovo veliko priznanje dobili su i Senad Glotić, Ahmed Zahirović, Tifaga Malkić, Hajrudin Musić, Ibrahim Dedić, Samid Jusufović i Salko Hodžić, a za doprinos u rješavanju socijalno-egzistencijalnih pitanja boraca Zlatne plakete su uručene Mehi Odošiću i Fahiru Zukiću. Dodijeljene su i nagrade najboljim sa sportskih takmičenja u streljaštvu i to: 1)RVI Srebrenik 2)PS Srebrenik i 3)UDB Srebrenik te šaha: 1)212. brdska brigada 2)Vatrogasci i 3)Unija veterana rata. Učenjem fatihe i polaganjem cvijeća na centralno šehidsko spomen-obilježje, delegacije Općine i boračkih udruženja odale su dužnu počast šehidima i poginulim borcima s područja srebreničke općine.

U asfaltni put u mjestu Mešići u G. Tinji 23.000 KM

Svečanim presijecanjem vrpce od strane Vikalo Faruka-savjetnika načelnika općine Srebrenik za obnovu i razvoj, Arnautović Mujkana-vijećnika MZ Gornja Tinja i Hrustić Sadila-općinskog vijećnika sa ovog mjesnog područja, sredinom juna mjeseca 2011.g, otvoren je novi asfaltni put u MZ-i Gornja Tinja-zaseok Mešići. Kako je istaknuto na prigodnoj svečanosti u put dužine oko 205m i širine 2,6m, utrošeno je oko 23.000 KM, od čega su mještani platili 30% a ostala sredstva su obezbijedena iz budžeta općine Srebrenik. Kompletne radove koje je izvela firma „Reweus“ Lukavac su trajali 7 dana, a mještani 20 domaćinstava Mešića nisu krili



Detalj sa otvorenja novog asfaltnog puta u zaseoku Mešići

zadovoljstvo urađenim poslom, obzirom da je na ovaj način ri-

ješeno jedan od gorućih infrastrukturnih problema.

U sanaciju puta NN Luka – Donji Moranjci 215.000 KM

U sklopu aktivnosti obilježavanja 21. juna, Dana općine Srebrenik, u prisustvu nekoliko stotina mještana N.N. Luka i Donji Moranjci, dana 20.06.2011.g. u 14 sati, svečano je otvoren rekonstruisani put između ova dva naselja. Radi se o putu dužine 1.950 metara, čija je ukupna vrijednost 215.000 KM, a cijeli iznos finansiran je iz budžeta Općine Srebrenik. – Počeo sam da se pomalo pribojavam kako će Čiflučani sve više napuštati ovo naselje, ali nakon što je došlo do rekonstrukcije ovoga puta zatim izgradnje vodovoda i rasvjete, očekujem da će početi ponovno naseljavanje, jer sada Čifluk (Donji Moranjci op.a.) dobiva sasvim druge oblike, kazao je ovom prilikom načelnik Općine Srebrenik, Mehmed Bajrektarević. Gostima se obratio i predsjednik MZ Donji Moranjci Zuhdija Moranjkić, koji je zajedno sa načelnikom Bajrek-

tarevićem, predsjedavajućim OV-a Ibrahimom Zukićem te bivšim načelnikom Osmanom Suljagićem, svečano presjekao vrpce i pustio ovaj put u pogon. Inače, u proteklu godinu dana u asfaltiranje puteva na području

Općine Srebrenik investirano je više od 2 miliona KM, a ukupno u sve infrastrukturne projekte, u navedenom periodu između dvije proslave Dana općine, investirano je više od 5 miliona KM.



Detalj sa otvorenja rekonstruisanog puta NN Luka-Donji Moranjci

Svečano obilježen 21. juni,



Neki od dobitnika općinskih priznanja i stimulativnih mjera u 2011.g.

I na ovogodišnjoj svečanosti, upriličenoj povodom obilježavanja Dana općine Srebrenik, bilo je prisutno na desetine gostiju, kako sa drugih općinskih područja tako i iz susjednih država. Uz predstavnike izvršne i zakonodavne vlasti Općine Srebrenik, svečanosti su prisustvovali između ostalih i predsjednik Skupštine TK-a Bajazet Jašarević, dopredsjednik Vlade TK i ministar finansija Mlađan Lazić, ministar poljoprivrede TK Imšir Škahić, ministar za rad i socijalnu politiku TK Sead Hasić, hrvatski konzul Josip Juras, dogradonačelnik



Položeno je cvijeće i proučena fatiha na spomen-obilježju

Vinkovaca Tomislav Šarić, direktor UKC Tuzla Enver Čičkušić, predstavnici Ambasade Malezije u BiH, srebrenički poslanici u kanto-



Hrvatski konzul i dogradonačelnik Vinkovaca su položili cvijeće na spomen kosturnicu

nalnom i federalnom parlamentu te načelnici i predsjedavajući vijeća nekih susjednih općina kao i mnogi drugi gosti. Nakon što je položeno cvijeće na spomen obilježje šehidima i poginulim borcima na Trgu Alije Izetbegovića iz rata 1992-1995. godina odnosno borcima NOR-a 1941-1945. godina, održana je svečana sjednica OV-a Srebrenik, na kojoj je načelnik Općine Srebrenik Mehmed Bajrektarević između ostalog kazao: -Srebrenik je poznat kao grad mira, tolerancije i suživota, koji gaji interkulturalni identitet. Želimo da ovo općinsko područje razvijamo kroz kulturno i socijalno



Svečanoj sjednici OV-a je prisustvovao veliki broj uglednih gostiju

oživljavanje, da očuvamo kulturnu baštinu, da unapređujemo kvalitet života kroz očuvanje životne okoline projektom toplifikacije.



Načelnik Bajrektarević: -Srebrenik je poznat kao grad mira, tolerancije i suživota

Dan općine Srebrenik

Posebno ćemo akcenat staviti na stvaranje poslovnog ambijenta kroz izgradnju poslovnih zona, čemu prethodi izgradnja neophodne infrastrukture. Siguran sam da ćemo znati iskoristiti poljoprivredne i turističke potencijale kao i rudna bogatstva koja posjeduje ovo



Humanista godine je Zukić Fahir zv. Butro

općinsko područje, kazao je Bajrektarević. Nakon prikazivanja 12 minutnog filma o infrastrukturnim projektima, realizovanim tokom proteklih godinu dana, uručena su općinska prizna-

nja. Najveća priznanja su Plakete i one su dodijeljene: Sakibu Ibračeviću iz Srebrenika, zatim Policijskoj stanici Srebrenik, Mustafi Muratoviću iz N.N. Kiseljak te posthumno Hasanu Sarajliću iz Srebrenika. Također, dodijeljene su i četiri Povelje i to Nerminu Tursiću iz Ljenobuda, dr. Ghassanu Husniu iz Tuzle, Zlatanu Sitareviću iz Srebrenika te Ahmetu Fazliću iz Podorašja, dok su ove godine priznanja za humaniste godine dobili Hamzalija Ibrić-Jata iz Čehaja i Fahir Zukić-Butro iz Lisovića. Zahvalnice su dobili: Mensur Kurtić iz Tinje Donje, Hadžira Hadžić iz Ljenobuda, Adnan Mujkić iz Srebrenika, Izet Salkić Dubokog Potoka, Faketa Ibrić iz Špionice, Sead Nuhanović iz N.N. Polje, Fehima Cviko iz Špionice te Fikret Ibrišimović iz Dedića. Dodijeljeno je i 8 novčanih nagrada i to uglavnom najboljim učenicima, studentima i sportistima i to: Safiji Vikalo iz Srebrenika, Adnanu Hasanoviću iz N.N. kiseljak, Dini Džaniću iz Srebrenika, Selvedini Jašarević iz Zahirovića, Azri Husić iz Srebrenika, Jasmini Tursunović iz Srebrenika, Adeli Joldić iz Lušnice te Senidi Hodžić iz Donjih Moranjaka. Nakon zvaničnog dijela goste su splotom igara i pjesmom zabavili članovi



Dobitnici Povelje

BZK „Preporod“ i HKD „Napredak“ Srebrenik, nakon čega je manifestacija završena svečanim puštanjem u rad moderne „Fabrike za reciklažu krutog otpada“ u Špionici, vl. Osmanović Samida zv. Braco, dok je zvanični program završen koncertom grupe „Mostar Sevdah Reunion“ pred oko 3000 posjetilaca na Pješačkoj zoni.



Nastup Mostar Sevdah Reunion



Dobitnici Plakete općine Srebrenik



Detalj sa svečanog presijecanja vrpce

„OS Petrol“ u fabriku za reciklažu otpada u Špionici ulaže 15 miliona KM

U sklopu obilježavanja 21. juna, Dana općine Srebrenik, u Špionici kod Srebrenika, firma „OS Petrol“ d.o.o. Srebrenik svečano je otvorila najsavremeniju fabriku za reciklažu otpada, do sada najveću ove vrste u BiH, koja će za općinu Srebrenik, ali i za cijelu BiH imati višestruki značaj. Izuzev toga što će zaposliti više od 50 radnika i ostvarivati godišnji promet od blizu 30 miliona maraka, značajan doprinos dat će i zaštiti čovjekove okoline. –Vlasnik ove firme Samid Braco Osmanović privatnim

ima kapacitet za recikliranje 100



Početak reciklaže

tona dnevno, odnosno jednu petinu ukupnog otpada na području TK-a, iako za sada radimo sa manjim kapacitetom, dok se ne uhodamo odn. dok ne obezbijedimo kvalitetne lance snabdijevanja sa otpadom koji se ovdje može reciklirati a radi se o: automobilskim i kamionskim gumama, frižiderima, elektronskom otpadu i gorivima dobijenim od sekundarnih sirovina, filterima za ulje... Ugrađene su najmodernije mašine firme „MeWa“ koje u zatvorenom proizvodnom procesu vrše dezintegriranje materijala, predmljevenje te granuliranje, nakon čega otpad pretvaramo u novu vrijednost, u novi proizvod- kazao je direktor ove firme Mirza Kešetović. Gostima se obratio i načelnik Mehmed Bajrektarević, koji je istakao da najveće bogatstvo

općine Srebrenik predstavljaju njeni građani, koji su, i u ovim teškim vremenima recesije, spremni ulagati u biznis, a Osmanović je jedan od najsvetlijih primjera. Predsjednik Skupštine TK-a Bajazit Jašarević nije krio oduševljenje što je jedan ovakav pogon upravo instaliran na području općine Srebrenik, istakavši u svom govoru da sada Tuzlanski kanton i država moraju poraditi na sistemskom rješavanju problema prikupljanja i recikliranja krutog otpada, kako bi se omogućila ekonomska isplativost ovakvih i sličnih projekata. Kada je riječ o značaju ovoga projekta, treba znati da se samo na području TK-a dnevno stvara više od 500 tona otpada koji uglavnom završava na lokalnim ili divljim deponijama, koji na taj način dodatno zagađuju životnu okolinu. Samo industrija u FBiH godišnje proizvede 2,4 miliona tona otpada a samo se oko 10% kvalitetno zbrine i vrlo malo reciklira i pretvori u novi proizvod. Nakon uvodnih govora vrpce za svečano puštanje mašina u pogon presjekli su zajedno vlasnik firme „OS Petrol“ Samid Braco Osmanović, Bajazit Jašarević predsjednik Skupštine TK-a i načelnik Općine Srebrenik, Mehmed Bajrektarević.



Mirza Kešetović:-Investicija od 15 miliona KM

biznisom bavi se više od 30 godina i ova firma najveći dio posla obavlja kao transportno preduzeće, a ovo je sada jedan novi vid poslovanja, od kojeg će vjerujem svi imati ogromnu korist. U ovaj projekat investirat će više od 15 miliona maraka i to dovoljno govori o koliko se ozbiljnom poslu radi. Ova fabrika

Asfaltirana pješačka staza i napravljeno igralište u NN Sječe

Početkom maja 2011.g. završen je projekat „Modernizacija pješačke staze od željezničke stanice Srebrenik do asfaltnog puta u NN Sječe“, kom prilikom su izvođači radova, firma „ITK Musić“ d.o.o. Srebrenik, asfaltirali pješačku stazu dužine nekoliko stotina metara i širine 1,2m. Tom prilikom je saniran i privremeni pješački viseći most preko rijeke Tinje, koji je u prethodnom periodu tokom proteklih poplava, isto kao i dio kamene obaloutvrde, ispod mosta u dužini od 10m, bio oštećen. Za navedeni projekat, koji je u potpunosti finansiran iz budžeta općine Srebrenik, utrošeno je 26.180 KM. Mještani NN Sječe su na vrijeme prepoznali sve mogućnosti koje sa sobom nosi izgradnja pješačke zone, te su formirali Odbor NN Sječe za izgradnju igrališta i igraonice, na čijem je čelu predsjednik Karić Mirza. Zahvaljujući općini Srebrenik, koja je na korištenje besplatno ustupila državno zemljište, mještani su krenuli sa krčenjem šikare, građevinskom pripremom podloge za igralište te nabavkom neophodne opreme i rekvizita. Paralelno sa završetkom asfaltiranja pješačke staze završena je i izgradnja modernog travnatog terena za mali nogomet, terena za odbojku na pijesku te igraonice za djecu, u šta je do sada utrošeno 2400 KM. Sve to je bilo moguće zahvaljujući kako donacijama mještana tako i brojnim ostalim donatorima, od kojih je Karić istakao zlatne donatore: Dževidu Tulić Zvorničanin i Okanović Mirzu, koji žive i rade u SAD. Svečano otvorenje je upriličeno sredinom juna 2011. godine, kada su načelnik općine Srebrenik Mehmed Bajrektarević i Mirza Karić, svečanim presijecanjem vrpce, pustili pješačku stazu i igralište u funkciju. Da se radi o veoma uspjelom projektu dovoljno govori činjenica da je igralište i igraonica veoma posjećena od strane brojne djece kako iz NN Sječe tako i iz Centra Srebrenika, koji je na 5 minuta lagane šetnje udaljen od navedenih sadržaja



Nova pješačka staza



Otvorenje staze i igrališta

Postavljena vertikalna turistička signalizacija



Turistička karta općine Srebrenik



Vertikalna turistička signalizacija u Srebreniku

Prilikom izrade Strategije razvoja općine Srebrenik 2011-2020.g., koja je finansijski podržana od strane UNDP i ILDP, predviđeno da se po završetku i usvajanju iste realizuje jedan projekat iz Strategije, koji bi finansijski, osim navedenih organizacija, podržala i Općina Srebrenik. Izabran je projekat „Postavljanje vertikalne turističke signalizacije na području općine Srebrenik te postavljanje turističkog info pulta i suvenirnice na ulazu u Pješačku zonu“, procijenjene vrijednosti od 67.378 KM (učesće UNDP-a 53.878 KM i Općine Srebrenik 13.500 KM), koji je nedavno i realizovan. Nakon izrade i revizije projektno tehničke dokumentacije te pribavljanja odgovarajućih saglasnosti i dozvola, pristupilo se odabiru najpovoljnijih ponuđača te realizaciji navedenog projekta. Do izlaska ovog biltena iz štampe očekuje se postavljanje turističkog info pulta i suvenirnice a sredinom juna 2011. godine radnici firme „Herceg“ d.o.o. Srebrenik su završili sa postavljanjem vertikalne turističke signalizacije, koja će, posebno učesnicima u saobraćaju koji ne poznaju dobro Srebrenik, omogućiti znatno bolje snalaženje u gradu te omogućiti relativno lak, prateći sljedivost znakova, dolazak do raznih kulturnih, historijskih, prirodnih i turističkih znamenitosti, kao i do zgrada Policije, Općine, Doma zdravlja, Doma kulture, Željezničke ili Autobuske stanice, Sportske dvorane, stadiona... - Postavljenom dodatnom turističkom signalizacijom usmjeravanje posjetilaca ka svim znamenitim objektima i destinacijama u Srebreniku će biti poboljšano. Na 52 lokacije je postavljeno 250 znakova, kao i 3 turističke karte Općine (jedna na Pješačkoj zoni i kod SRC-a te jedna kod Doma kulture) te 15 oznaka za Stari grad Srebrenik. Ovim činom je obogaćena turistička slika i ponuda grada. Turisti će od sada, bez ikakvih problema moći da dolaze do objekata koji ih zanimaju, a to je vrlo bitno za jedan grad, koji polako, ali sigurno prepoznaje i pokušava da realizuje svoje šanse u turizmu – istakao je koordinator navedenog projekta ispred općine Srebrenik Ibrahim Smajlović.

Premijer Vlade TK Sead Čaušević posjetio Općinu Srebrenik



prioriteta, kaže premijer Čaušević. Načelnik Mehmed Bajrektarević također nije skrivao zadovoljstvo posjetom premijera, kazavši još neke detalje sa ovoga sastanka: -Zadovoljan sam ovim sastankom jer premijer i njegovi ministri žele iskreno da sarađuju sa općinama. Kazali smo svoje prioritete koje trebamo riješiti i on je obećao da će nam izaći u susret. Tu je još pomoć u oblasti zdravstva, nabavka određenih aparata za pružanje kvalitetnijih usluga, zatim iz oblasti obrazovanja kako bi se završila izgradnja sportske dvorane kod Druge osnovne škole, izgradnja zgrade Gimnazije, a imamo i problem sa bivšim radnicima Interpleta, kojima je potrebno uvezati radni staž, kaže načelnik Bajrektarević.

Premijeru Vlade TK je priredn srdačan doček

Dana 10.05.2011.g., načelnik općine Srebrenik Mehmed Bajrektarević sa svojim saradnicima, ugostio je novog premijera Vlade TK-a Seada Čauševića sa ministrima, a svrha razgovora je pomoć Vlade TK-a u rješavanju krucijalnih problema koji stoje pred izvršnom i zakonodavnom vlašću Općine. Nakon sastanka premijer Čaušević je kazao: - Ovo je radna a nikako kurtoazna posjeta Općini Srebrenik i želimo da svaki sastanak i posjetu općinama iskoristimo kako bismo nešto korisno uradili. Konkretizirali smo prioritete koje treba uraditi u Općini Srebrenik, a to je saobraćajna infrastruktura, deponija smeća, toplifikacija, nova zgrada Općine, status izbjeglih i raseljenih lica, povratak srpskog stanovništva... Što se tiče same deponije, mi moramo pronaći novu lokaciju jer do kraja godine deponija u Babunovićima mora biti zatvorena. Također, regionalni put Srebrenik-Gračanica je u očajnom stanju i to će nam biti također jedan od



Detalj sa sastanka

Predsjednik FBiH Živko Budimir posjetio općinu Srebrenik

Dana 02.07.2011.godine, predsjednik FBiH Živko Budimir posjetio je općinu Srebrenik. Uglednog gosta su srdačno dočekali općinski načelnik Mehmed Bajrektarević i predsjedavajući OV-a Srebrenik Zukić Ibrahim sa saradnicima. Načelnik je Predsjednika upoznao sa stanjem u općini Srebrenik, s realiziranim i budućim projektima. Predsjednik je pohvalio agilnost u radu općine Srebrenik, napomenuvši kako će mnogi konstruktivni prijedlozi, čija realizacija poboljšava kvalitetu života stanovnika, naići na potporu Vlade FBiH i njegovu osobnu. Napomenuo je kako se mora voditi računa o jednakopravnosti naroda i građana, kazavši kako je svaki narod u Bosni i Hercegovini ugrožen na onom području u kojem je manjina. Nakon zvaničnog dijela sastanka Predsjednik je u pratnji domaćina obišao i Stari grad Srebrenik iz 1333. godine, te se uvjerio u ogromni



Mehmed Bajrektarević, Živko Budimir i Ibrahim Zukić u obilasku Strog grada Srebrenika

turistički potencijal ove općine, koji je nažalost još uvijek nedovoljno iskorišten.

Završena treća likovna kolonija „Majevica 2011“



Učesnici likovne kolonije "Srebrenik 2011"

Pod motom "Umjetnici spašavaju Majevicu" od 09.06.-15.06. 2011. godine održana je treća likovna kolonija "Majevica 2011". Otvaranje Kolonije bilo je praćeno zanosnim zvucima tamburaša, koji su podigli raspoloženje svih ovogodišnjih učesnika i to: Magdalene Nuneske iz Makedonije, Zorana Lesjaka iz Slovenije, Željka Dragičevića iz Srbije, Envera Krajišnika i Samije Hodžić iz Goražda, Zorana Kovačevića, Enise Pilavdžić i Marine Trogrlić, svi iz Tuzle te Zukić Lejla iz Srebrenika i Tubić Arnela iz Kalesija. U središtu umjetničkog izražaja bila je planina Majevica koja svojim položajem, atrakcijama, neditnutom prirodom i izvrsnim izletištim, spaja



Detalj sa likovne kolonije

nekoliko općina Sjeveroistočne Bosne. Majevica je planina koja svojom ljepotom olakšava rad umjetnika, ali ujedno ona je jedan veliki izazov za sve one koji prirodne ljepote žele prenijeti na svoja platna. Organizator Kolonije je Svjetlan



Slike nastale na ovogodišnjoj slikarskoj koloniji

Bešić, privatni poduzetnik iz Srebrenika, koji se bavi slikarstvom i fotografijom, a svojim radom ukazuje na važnost i značaj umjetnosti, naročito kada je ona u vezi sa prirodnim okruženjem. Slikari iz Makedonije, Slovenije, Srbije i iz cijele BiH proveli su šest nezaboravnih dana u prelijepom ambijentu, koji je sam po sebi bio dovoljna inspiracija za nastanak umjetničkih djela rađenih u raznim slikarskim tehnikama. Imanje na kojem su umjetnici boravili je udaljeno od Srebrenika 9 kilometara, a nalazi se na 720 metara nadmorske visine. Slike nastale na Koloniji biće izložene u sklopu tradicionalne kulturne manifestacije "Dani Povelje 2012" Srebrenik, a novac dobijen od prodaje dijela slika će se iskoristiti za humanitarne svrhe (stipendiranje studenata).

Održana promocija 4 knjige o začudnosti govora



Detalj sa promocije 4 knjige o začudnosti govora

Dana 04.05.2011.godine, u prostorijama Medžlisa Islamske zajednice Srebrenik, održana je promocija četiri knjige pod nazivom "Projekat o začudnosti govora". Promociji je prisustvovalo 40 imama, na čelu sa glavnim imamom i predsjednikom. Promociju je otvorio glavni imam Refik-ef koji je, nakon uvodnog govora, dao riječ gostima, direktoru izdavačke kuće „Bookline“ d.o.o. Sarajevo Bećirović Edinu i hfz. Mr. Dizdarević Mevludinu. Promotor hfz. Mevludin-ef je istakao da predstavljene 4 knjige o začudnosti govora govore o važnosti hutbe i izazovima današnjeg Imama i Hatiba. Knjige se sastoje od 104 hutbi naših uglednih alima, hafiza, imama iz dijaspor. Ukazao je na značaj

današnje riječi kao i na značaj i ulogu imama u današnjem vremenu. Imam danas ima veliku odgovornost jer živi u vremenu vrtloga, vremenu interneta, mas medija, u vremenu kada ljudi imaju puno informacija, tako da se postavlja logično pitanje kako da imam svakog petka zaintrigira prisutne džematlije na džuma-namazu svojom hutbom, kako da postigne da čuju nešto novo i da mu hutba bude zanimljiva. Nadamo se da će Vam ove knjige pomoći da savladate prepreke današnjice-istakao je Mevludin-ef. Glavni imam je zahvalio promotorima, poželio im puno uspjeha, te preporučio imamima da se u njihovim kućnim bibliotekama nađu ova četiri bisera. „Bookline“ je izdavačka kuća koja objavljuje djela koja se bave odgojem, obrazovanjem, moralnim vrednotama, te kulturom i estetikom gledano s vjerskog aspekta. Osnovna ideja vodilja ove kuće jeste da se široj čitalackoj publici približe razmišljanja uglednih vjerskih autoriteta pisana na popularan način, pisana pitkim jezikom, jezikom običnog čovjeka i lepršavim stilom. Do sada su to bila djela pisana na arapskom jeziku. Namjera je da se u skorijoj budućnosti oformi tim mladih, ambicioznih ljudi koji će biti spremni uhvatiti se u koštac s djelima eminentnih autora koji se bave gorućim svjetskim problemima, političkom i društvenom analizom, naukom i obrazovanjem, te književnošću i kulturom pisanom na važnijim svjetskim jezicima kao što su engleski, njemački, francuski jezik.

Promocija romana „Fantazmagorije vremena“

Dana 06.04.2011.godine, s početkom u 19 sati, u prostoru Gradske knjižnice Sveti Ivan Zelina, ispunjenim do posljednjeg mjesta, predstavljene su između ostalih knjiga i roman „Fantazmagorija vremena“ autora Kemala Nurkanovića iz Bosne i Hercegovine, iz Srebrenika. Nakon pozdravnog govora ravnateljice Valentine Strelar Dananić, urednik i voditelj književne tribine Ilija Matić iz Županje predstavio je najprije zbirku pjesma „Razmišljanja moje duše“ mlade autorice Ane Tuković iz Orešje Gornje. Ana je za svoje pjesme na kajkavskom dijalektu kao i u Zagrebu i ovdje izmamila veliki aplauz nakon svake pročitane pjesme. Nakon toga uslijedilo je predstavljanje zbirke pjesama „Prekorak tuge“ mladog autora iz Virovitice Tibora Žukina koji iza sebe ima već pet objavljenih radova, te zbirke pjesama „Rođena da bih uspjela“ Rumunke Ramone Adriane Vukelić iz Otočca. Urednik Ilija Matić je zatim predstavio roman „Fantazmagorije vremena“ autora Kemala Nurkanovića iz Bosne i Hercegovine, iz Srebrenika, pri tomu istaknuvši da je nakon predstavljanja u Osijeku, gostovanja u Babinoj Gredi, Drenovcima te predstavljanja u Zagrebu ovo samo potvrda kvalitete

romana „Fantazmagorije vremena“, koji je doživio i svoje objavljivanje osim u Bosni i Hercegovini i u Hrvatskoj. Autor Kemal Nurkanović u svom obraćanju publici istaknuo je da dolazi iz Srebrenika, najljepšeg mjesta u Bosni i Hercegovini, u kojem, i pored strašnog rata, danas sva tri naroda žive u slozi. Kemal Nurkanović je nakon toplih riječi o svom Srebreniku pročitao jedan odlomak iz svog romana, za koji je dobio velik pljesak od strane poštovalaca lijepe riječi.



Promocija knjige Fantazmagorije vremena

Zapažen nastup članova BZK „Preporod“ i HKD „Napredak“ povodom obilježavanja Dana općine

Dana 17.06.2011.g., u sklopu obilježavanja 21. juna, Dana općine Srebrenik, članovi Bošnjačke zajednice kulture „Preporod“ i Hrvatskog kulturnog društva „Napredak“ Srebrenik priredili



Nastup članova HKD "Napredak" Srebrenik

su raznovrstan kulturno-zabavni program. Pred početak manifestacije članovi lokalne izvorne grupe obučeni u živopisne narodne nošnje prošli su gradskim šetalištem svirajući na tradicionalnim narodnim instrumentima zurlama i bubnjevima, a potom su na otvorenoj pozornici u centru grada članovi dva kulturna društva



Nastup sazlije dr. Hašima Muharemovića

priredili bogat kulturno-zabavni program. Pred velikim brojem posjetilaca, članovi folklornih sekcija „Napretka“ i „Preporoda“ izveli su splet narodnih igara iz BiH, Slavonije i Banata, a nastupile su i izvorne grupe HKD „Napredak“. Odličnom izvedbom nekoliko sevdalinki posjetiocima su se predstavili i Jasmin Hasić, Azra Husarčić, Vahida Halilović i Ahmet Hogić, a posebno oduševljenje brojne publike izazvao je nastup dr. Hašima Muharemovića, jednog od najboljih bosanskohercegovačkih sazlija.

Održana manifestacija pod nazivom „Putevi spasa“

Dana 08.07.2011.g., u organizaciji Bošnjačke zajednice kulture „Preporod“ Srebrenik, u kino Sali Doma kulture u Srebreniku, održana je manifestacija pod nazivom „Putevi spasa“. U okviru ove manifestacije



Detalj sa promocije knjige „Putevi spasa“ autora Fadila Duranovića iz Srebrenika

otvorena je izložba slika na temu „Srebrenica“, te održan okrugli sto posvećen Srebrenici. Na ovu temu, prisutnim posjetiocima su govorili predstavnici Arhiva TK, te savjetnik općinskog načelnika Nermin Tursić. U okviru manifestacije upriličena je i promocija romana „Putevi spasa“ autora Fadila Duranovića iz Srebrenika. O ovom romanu govorili su urednik Ilija Matić, recenzent



Otvorena je i izložba slika na temu "Srebrenica"

prof. Jasna Hadžiselimović i dramaturg Hasan Džafić, koji je istakao da je, po mišljenju stručnjaka za književnost, roman „Putevi spasa“ jedan od najboljih književnih djela napisanih na temu Srebrenice. Prisutnim gostima obratio se i sam autor naglasivši da mu je ovo bio najveći životni izazov, te da ga je svo vrijeme pisanja proganjala misao i pitanje: Bože, da li ja, ili bilo ko drugi koji nije proživio golgote Srebrenice, imam pravo pisati na tu temu? Ipak, o Srebrenici treba pisati, jer sve što nije zapisano, biva zaboravljeno, a sve što se zaboravi, može se i ponoviti, istakao je autor Fadil Duranović.

Studenti iz Malezije na praksi u Srebreniku

Iz nama prijateljske Malezije sa Universiti Tehnologi MARA - Faculty of Business and Managment - Shah Alam Selangor u naš Srebrenik je stigla grupa od 9 studenata. Ova posjeta i boravak su rezultat priprema koje su trajale skoro godinu dana, kao i čestih sastanaka u malezijskoj ambasadi i posjete malezijskog ambasadora, ekscelencije Zukifli Adnana općini



Detalj sa svečanog prijema

Srebrenik u martu 2011. godine. Takođe je kasnije u Kuala Lumpuru u Maleziji, održan jedan sastanak sa ambasadorom Zulkiflijem, rektorom Univerziteta, dekanom i zamjenikom dekana Fakulteta za biznis i menadžment, a istom je prisustvovao i predstavnik općine Srebrenik Esad Dedić. Dana 02.07.2011. godine, malezijski studenti su doputovali u Srebrenik, nakon čega su za sve njih, kao i za ostale goste-predstavnike



U srebreničkim firmama praksu će obavljati 9 studenata iz Malezije

ambasade Malezije u BiH te predstavnike naših preduzeća, općinski načelnik Mehmed Bajrektarević i predsjedavajući OV-a Srebrenik Ibrahim Zukić, priredili svečani prijem u hotelu „Park“. Prisutnima su se prigodnim riječima dobrodošlice obratili Bajrektarević i Zukić, predstavnik ambasade Malezije Mohamed Onn se zahvalio domaćinima, istakavši da je ovo početak saradnje i razmjene studenata, dok se ispred okupljenih privrednika obratio Ismet Šiljić, direktor firme „Kopex Sarajlić“. Studenti su smješteni u tri privatna stana i obavljaće praksu u devet naših firmi i ovdje će boraviti do 29.11.2011. g., kada se vraćaju kućama. Za 11. juli je za studente planirana posjeta i prisustvo dženazi u Potočarima.

Sa volonterskim radom krenulo 35 volontera

Općina Srebrenik je u cilju bržeg zapošljavanja lica sa višom i visokom stručnom spremom, i u 2011.g. planirala određena sredstva u općinskom budžetu, na osnovu čega je i raspisala Javni poziv za prijem volontera u pravne subjekte na području općine Srebrenik. Služba za društvene djelatnosti, raseljena i izbjegla lica je provela proceduru raspisivanja javnog poziva, a Komisija imenovana od strane općinskog načelnika izvršila rangiranje svih kandidata koji su se prijavili na ovaj Javni poziv. Kao osnovni kriterij korišteno je vrijeme provedeno na evidenciji Službe za zapošljavanje Srebrenik od vremena diplomiranja. Od ukupnog broja prijavljenih kandidata- njih 62, jedan nije ispunjavao uslove javnog poziva, jedan kandidat je odustao zbog pronalaska zaposlenja, a tri kandidata nisu imala kompletnu dokumentaciju. Na osnovu prije prikupljenih potreba od pravnih subjekata izvršeno je raspoređivanje volontera u skladu sa traženim profilima tako da je od 01.07.2011.godine sa volonterskim radom krenulo 35 volontera, dok bi ostali volonteri čiji su profili vezani za obrazovanje trebali krenuti sa volontiranjem početkom školske godine, odnosno nakon dobijanja potrebnih saglasnosti od nadležnih ministarstava. Treba napomenuti da jedan volonter koji je stekao zvanje Profesora turskog jezika nije mogao biti raspoređen



Od 1. jula 35 volontera krenulo sa radom

jer nije bilo iskazanih potreba za istim, ali je ostavljena mogućnost istom da sam pronađe pravni subjekt u kom bi odradio volonterski staž, s kojim bi općina Srebrenik potpisala ugovor pod istim uslovima kao i sa ostalim volonterima. Općina Srebrenik je među prvim općinama u BiH, koje su na ovaj način odlučile pomoći licima sa višom i visokom stručnom spremom, i do sada je (u protekle 4 godine) je iz budžeta u navedene svrhe izdvojila oko 750.000 KM.

Održan okrugli sto pod nazivom „Spomenici – juče, danas, sutra“

U organizaciji srebreničkih boračkih udruženja proisteklih iz proteklog rata u BiH, a u sklopu manifestacije „Dani otpora općine Srebrenik“, dana 17.06.2011.g u srebreničkom Domu kulture održan je okrugli sto pod nazivom „Spomenici – juče, danas, sutra“. O ovoj temi govorili su historičari dr. Edin Mutapčić i mr. Nermin Tursić, te predstavnici općine Srebrenik, boračkih udruženja i nevladinih organizacija. U proteklom periodu, rečeno je na okruglom stolu, na području općine Srebrenik izgrađen je 31 spomenik šehidima i poginulim borcima u proteklom ratu u BiH, u čiju izgradnju je uloženo je 619.500 KM. Građeni su s ciljem da nas stalno podsjećaju na ono što se događalo u BiH od 1992. do 1995. godine i na najbolje sinove koji su za odbranu domovine dali svoje živote. Nažalost, rečeno je na skupu, mnogi nisu svjesni ovih činjenica, naročito predstavnici mlade generacije koji ne tako rijetko šehidske spomenike pretvaraju u mjesta okupljanja i provoda u kasnim noćnim satima koji nisu primjereni našim svetinjama koje podsjećaju na najsvjetlije trenutke iz novije bh. istorije. Učesnici okruglog stola oštro su osudili i nedavno skrnavljenje spomenika četvorici šehida u naselju Ježinac, koje je i bilo jedan od glavnih povoda za organizaciju okruglog stola posvećenog šehidskim i drugim spomenicima. Uz ulaganje dodatnih napora na održavanju i zaštiti spomenika, u narednom periodu, rečeno je na skupu, mora se puno više pažnje posvetiti razvijanju patriotizma i svijesti kod mladih o tome da ispod šehidskih spomenika leže časni ljudi koji su dali svoje živote za slobodu svog naroda.



Detalj sa okruglog stola



Spomen-obilježjima treba posvetiti veću pažnju

Šehidima Caga otvoreno spomen-obilježje

Šehidima MZ Cage, dana 19.06.2011.g svečano je otvoreno spomen-obilježje. Uz brojne goste sa viših nivoa vlasti, prisutnim majkama, sestrama, očevima, braći..., koji su brisali suze prisjećajući se svojih najmilijih, obratio se načelnik Općine Srebrenik, Mehmed Bajrektarević, koji je između ostalog kazao: - Ovo spomen-obilježje svakodnevno će nas podsjećati na sinove Bosne iz Caga, koji su položili svoje živote, kako bismo mi danas slobodno koračali našom domovinom. Neka ovo spomen-obilježje bude jedan mali znak zahvalnosti i neka to bude opomena svima nama. Nakon uvodnih govora zajednički su presjekli vrpцу i otkrili spomen-obilježje načelnik općine Srebrenik Mehmed Bajrektarević, predsjedavajući OV-a Srebrenik Ibrahim Zukić, poslanik u Parlamentu FBiH Osman Suljagić, ministar poljoprivrede u Vladi TK-a Imšir Škahić, predsjednica OPŠ-PB Srebrenik Senada Zahirović, predsjednik MZ Cage Ernad Osmić i Ćazim Salkić iz porodice poginulih boraca. U nastavku programa Ernad Osmić je zahvalio izvršnoj i zakonodavnoj vlasti Srebrenika, koji su obezbijedili 10.000 KM te Ministarstvu za boračka pitanja u Vladi TK-a, koji su obezbijedili 5.500 KM, za izgradnju ovog spomen-obilježja, koji su na taj način dokazali da ne zaboravljaju svoje najbolje sinove, te izrazio nadu da će se i ubuduće nastaviti pomagati i porodicama poginulih boraca i šehida.



Detalj sa otvorenja



Spomen obilježje u Cagama

Udruženje privrednika Srebrenik na sajmu poduzetništva „Sapo 2011“ u Gračanici

U prisustvu visokih gostiju, privrednika i mnogobrojnih građana, dana 20.04.2011.godine, otvoren je Drugi gračanički sajam „Sapo 2011“, koji su zajednički organizovali BKC Gračanica, općina Gračanica i Udruženje privrednika Gračanica. Otvaranju sajma prisustvovali su ambasadori: Francuske – Roland Žil, Makedonije – Rami Redžepi i Albanije – Flamur Gaši, te konzul Republike Hrvatske u Tuzli gospodin Josip Juras. Od domaćih gostiju, otvaranju su prisustvovali:



Premijer Vlade TK Sead Čaušević i ambasador Makedonije Rami Redžepi sa Vikalo Farukom na našem štandu

potpredsjednik Federacije BiH, g-din Svetozar Pudarić, predsjednik Vlade F BiH Nermin Nikšić, premijer Vlade TK Sead Čaušević, zatim ministri u Vladi F BiH i Vladi TK, predstavnik privredne komore Švedske i Norveške gosp. Slobodan Nešković, predstavnici izvršne i zakonodavne vlasti susjednih gradova i općina, kao i predstavnici više privrednih udruženja asocijacija iz Bosne i Hercegovine. Prisutnima su se kratko obratili predsjednik Vlade F BiH Nermin Nikšić i premijer Vlade TK Sead Čaušević, koji su nakon toga, presijecanjem

vrpce simbolično otvorili ovogodišnji Sajam. Na konferenciji koja je održana poslije otvaranja i obilaska Sajma, privrednici su dali nekoliko korisnih prijedloga za otklanjanje administrativnih i drugih smetnji poslovanju domaćih kompanija, posebno izvoznika. Inače, na sajmu je izlagalo svoje proizvode preko 150 izlagača, među kojima je bio i štand Udruženja privrednika Srebrenika (UPS). -Ne želimo biti kritični, ali naš štand je mogao i morao biti reprezentativniji i kvalitetniji, a naši privrednici su trebali daleko kvalitetnije iskoristiti priliku koja im je pružena. Pravdanje tipa da su za nastup potrebna velika novčana sredstva padaju ovaj put „u vodu“, obzirom da je zakup štanda platila općina Srebrenik, dok opravdanja tipa da se nastupom ništa neće postići, da im to ne dozvoljavaju poslovne obaveze i sl. govori prije svega o stanju marketinga i strategiji razvoja naših firmi. Zahvaljujući par firmi kao što su: Tvornica „Corn flips“, „Herceg“, „Voćni rasadnik“, „MOM“, Motel „Park“ i diskoteka „Trocadero“ tehnički sekretar UPS-a Barčić Alisa te predstavnici općine Srebrenik Nedim Mujčinović i Esad Dedić imali su prvog, udarnog dana, dovoljno propagandnog materijala i plakata, kojim su mogli predstaviti naše privredne potencijale, ali su tek u naredna tri dana predstavnici i drugih firmi iskoristili priliku da se kvalitetno predstavljaju na sajmu-istakao je savjetnik općinskog načelnika za privredu Vikalo Faruk. -Ovo je pokazatelj da naša Općina i Udruženje privrednika moraju odvojiti određena novčana sredstva, kako bi pripremili kvalitetnu sajamsku prezentaciju, koja bi se mogla, kao unificirana, koristiti i na ostalim sajmovima-istakao je Nermin Tursić, savjetnik općinskog načelnika za infrastrukturu. I pored nedostataka naš štand je bio veoma posjećen, putem laptopa su konstantno prikazivani filmovi o Srebreniku te privrednim i drugim projektima, uručeni su brojni propagandni materijali, posjetioci su konzumirali široku paletu kvalitetnih proizvoda, koji su, kao i više puta do sada, donirani od strane firme „Corn flips“ d.o.o. Srebrenik, tako da je naš nastup na kraju bio više nego solidan.

IN MEMORIAM DŽANIĆ (HASANA) SAMED 1964-2011



Dana 16.06.2011.g., nakon teške bolesti, u 47. godini života, preminuo je naš dragi i nikad prežaljeni kolega Džanić Samed. Znamo da ne postoji utjeha niti zaborav, samo beskrajna tuga, praznina i vječno sjećanje na njegovu plemenitost, privrženost poslu i dobrotu koju je pružao, kako članovima svoje porodice tako i svima nama, koji su imali priliku s njim sarađivati. Članovi Samedove porodice, najbliža rodbina te brojni prijatelji i poznanici su prisustvovali dženazi, koja se obavila 18.06.2011.g. na mezarju u D. Srebreniku, te proučili fatihu za dušu umrlog. Inače Samed Džanić je rođen 03.03.1964.g. u Donjem Srebreniku, a decembra 1998.g. je diplomirao na Poljoprivrednom fakultetu u Osijeku. Bio je aktivan pripadnik ARBiH, a posljednjih 15 godina radio je u Službi za budžet, poduzetništvo i nadzor općine Srebrenik, prvo kao poljoprivredni inspektor dok je posljednje 2 godine radio kao stručni savjetnik za poljoprivredu i vodoprivredu. Nekoliko godina je bio i V.D. šefa navedene službe. Iza njega je ostala supruga Emina i dvoje djece.

Održani Peti susreti staničara



Položeni su vijenci i na spomen-kosturnicu

Krajem juna 2011.g. u motelu „Gradina“ u Srebreniku, održani su „Peti susreti staničara“, na kojima se okupilo oko 80 autohtonih stanovnika ovog grada, koji su odrastali u ovom gradu sredinom prošlog vijeka, u vrijeme kada je željeznička stanica bila sinonim za ime ovog grada. Na ovim tradicionalnim susretima okupilo se oko 80 staničara koji još žive u Srebreniku, ali i onih koje su životni putevi još davno odveli na razne strane svijeta. Mnogi od njih došli su iz Njemačke, Austrije, Holandije, Švicarske, Srbije, Hrvatske, SAD-a i drugih zemalja, a zahvaljujući ovoj manifestaciji, mnogi od njih po prvi put su se susreli u Srebreniku nakon 1968. godine. Cilj je, kako ističu u Organizacionom odboru, da se ponovo upostave veze među osobama različitih nacija i i socijalnog statusa, koje jedino povezuju uspomene na zajedničko odrastanje u Srebreniku u periodu između 1950. i 1968. g. Učesnici susreta okupili su se na željezničkoj stanici u Srebreniku, gdje su evocirali uspomene na davna vremena kada je u centru Srebrenika bilo svega desetak kuća i kada je upravo željeznička stanica predstavljala centar društvenog života. Tu su, kako ističu učesnici susreta, provodili najveći dio svog slobodnog vremena dočekujući i isprraćajući vozove, a na tom prostoru

uspostavljena su mnoga prijateljstva, ali se i rodile prve ljubavi. Nakon okupljanja i upoznavanja na željezničkoj stanici, zajedno su vozom otputovali do Tuzle, gdje su polaganjem cvijeća na tuzlanskoj kapiji odali počast stradalnoj mladosti ovog grada, a nakon povratka u Srebrenik položili su cvijeće i na spomen obilježja poginulim borcima u protekla dva rata na području ove Općine. Upriličena je i posjeta porodicama preminulih staničara u periodu između dva susreta, a organiziran je i obilazak proizvodnih pogona srebreničke firme „Herceg“. Nakon toga nastavljeno je druženje u motelu „Gradina“, bivšoj gradskoj kafani, koja uz željezničku stanicu, predstavlja najstariji objekt u centru Srebrenika. Na kraju ovih susreta dogovoreno je da se do naredne godine pokuša i zvanično registrirati Udruženje građana staničara, kako bi se očuvala tradicija okupljanja ljudi porijeklom iz ovog grada.



Staničari ispred željezničke stanice u Srebreniku

Strijelci i planinari najbolje spremaju kotliće



Detalj sa srebreničke Kotličijade 2011

U organizaciji Planinarskog društva „Majevica“, krajem aprila 2011.g., održana je treća po redu kotličijada u Srebreniku, a prema ocjeni žirija (Sakib Ibračević, Izet Džanić i Senahid Nurkanović-Buco), najbolji kotlić spremaju organizatori, tj. PD „Majevica“, na drugom mjestu je d.o.o. „Mujezinović“, dok je treće mjesto pripalo mesnici „Bašić“. U drugoj konkurenciji je bilo spremanje „fiš-paprikaša“, a kako je to žiri ocije-

nio, najbolji u tome su bili Streljački klub „Ljiljan“, drugo mjesto osvojila je MZ „Kiseljak“, dok je treće mjesto osvojila firma d.o.o. „Jata“. Na ovogodišnjoj kotličijadi pored JU „Sportsko-rekreativni centar“ Srebrenik, učestvovalo je petnaest ekipa, koje su prikazale zavidan nivo spremanja hrane, ali i dobrog štimunga i zabave.



Stručni žiri ocjenjuje kotliće

Veliki uspjeh Odjeljenja muzičke škole Srebrenik



Nastup Emine Emkić za Dan Prve OŠ Srebrenik

najbolje savladali pređeno gradivo i koji su nakon interne audicije odabrani da predstavljaju našu školu. Specifičnost ocjenjivanja na takmičenjima muzičkih škola je što se na osnovu osvojenih bodova rangira dostignuti nivo takmičara, a ne da se jednostavno redaju od 1 mjesta pa nadalje. Tako se sa osvojenih 90-100 bodova osvaja prvo mjesto, od 80-90 drugo mjesto, od 70-80 treće mjesto, od 60-70 specijalna diploma a od 50-60 bodova osvaja se diploma za učešće. Često se znalo desiti da niko ne osvoji prvo mjesto ili da po desetak i više učenika dovoljno savlada vještinu sviranja i da cjelokupnim nastupom pred žirijem osvoje dovoljno bodova da osvoje druga ili treća mjesta ili pak ne dobiju uopće nikakva priznanja, jer osvoje manje od 50 bodova. Što se tiče našeg Odjeljenja muzičke škole treća mjesta su osvojile Emkić Emina (sa 73 boda) i Muratović Ema (sa 71 bodom), dok su Mujčinović Amra i Buljubašić Emil sa po osvojenih 59 bodova dobili diplome za učešće. To je jedan veliki podstrek, kako za njihov tako i naš daljni rad, i siguran sam da pred njima predstoji blistava budućnost, iako na osnovu viđenog smatram da su našu školu podcijenili, jer je sve četvero naših takmičara objektivno zaslužio više bodova –rekao je Mirza Sitarević, nastavnik klavira u Odjeljenju muzičke škole Srebrenik i organizator odlaska naših takmičara na takmičenje. Inače na 14. Federalnom takmičenju učenika i studenata muzike učešće je uzelo 370 učenika iz FBiH.

Uspjeh učenika Druge OŠ Srebrenik na kantonalnom takmičenju iz hemije

Dana 16.04.2011.g. JU OŠ "Pasci", po drugi put, bila je domaćin kantonalnog takmičenja iz hemije. Organizatori ovog takmičenja učenika osnovnih škola su Ministarstvo obrazovanja, nauke, kulture i sporta TK i Pedagoški zavod Tuzla. Učestvovalo je ukupno 49 učenika iz 41 škole sa područja našeg kantona. Učenici su pokazali zavidno svoje znanje i vještine iz oblasti hemije. Škola domaćin je od strane gostiju, nastavnika i učenika dobila pohvale za svoje gostoprimstvo i organizaciju. Pojedinačno, plasman je sljedeći: Prvo mjesto je osvojila Ahmetagić Ilma iz OŠ „Sjenjak“, drugo mjesto su podijelili Eldar Dervišević iz OŠ „Bašigovci“ i Jasmin Hadžić iz „II OŠ Srebrenik“. Treće mjesto je osvojila Mahira Tankić iz OŠ „Mehmed-beg Kapetanović Ljubušak“, a četvrto mjesto zauzeo je Amir Hadžić iz „II OŠ Srebrenik“. Peto mjesto je Mejra Musić, iz OŠ „Stupari“, dok je šesto mjesto zauzela Belkisa Mujanović iz OŠ „Hasan Kikić“. Sedma mjesta su podijelili Amina Mustačević iz OŠ „Sjenjak“ i Narcisa Husić iz OŠ „Mejdan“. Osmi je Kenan Hasić iz OŠ „Stjepan Polje“, a deveto mjesto su Fatima Halilović iz OŠ „Kladanj“ i Eldin Muminović iz OŠ „Vukovije“. Deseto mjesto je zauzela Almedina Burek iz OŠ „Gornja Tuzla“. Ekipno, najviše uspjeha su imale škole „Sjenjak“, iz Tuzle i „II OŠ Srebrenik“, iz Srebrenika, kojoj je ovo samo nastavak dosadašnjih uspješnih rezultata na kantonalnim takmičenjima iz ovog i drugih predmeta, a čija bi kompletna prezentacija zauzela previše prostora, tako da je ovo samo jedan presjek uspjeha ove škole.



Učesnici kantonalnog takmičenja iz hemije



Dodjela nagrada najboljim hemičarima

Izabrano najljepše kućno i školsko dvorište te poslovni krug

Dana 09.06.2011.g., u organizaciji Ekološkog društva „Eko zeleni“ Srebrenik i uz finansijsku pomoć općine Srebrenik, u Plavoj sali srebreničkog Domu kulture, održana je prigodna svečanost, na kojoj su proglašeni pobjednici tradicionalnog konkursa za izbor najbolje uređenih kućnih dvorišta, poslovnih krugova i dvorišta obrazovnih ustanova. Odlukom stručnog žirija, u kategoriji



Prvonagrađeno dvorište Šiljić Mehmedalije

kućnih dvorišta prvo mjesto je osvojio Mehmedalija Šiljić iz Čojluka, na drugom mjestu je Suad Šabić iz Brnjičana, dok je treća nagrada za najbolje uređeno



Drugonagrađeno dvorište Šabić Suada

dvorište pripala Nusretu Slanjankiću iz Špionice. Za najbolje uređen poslovni krug proglašen je prostor oko JU Sportsko-rekreativni centar Srebrenik, a u kategoriji



Trećenagrađeno dvorište Slanjankić Nusreta



Najuređeniji poslovni krug ima SRC Srebrenik

obrazovnih ustanova ove godine najbolje je školsko dvorište OŠ „Podorašje“. Predstavnicima najboljih kućnih, poslovnih i školskih dvorišta uručene su diplome, novčane nagrade i sadnice ukrasnog drveća. Za doprinos u unapređenju javnih zelenih površina i realizaciji programskih ciljeva Ekološkog društva „Eko zeleni“ Srebrenik, posebna priznanja uručena su Almiru Tursunoviću iz Tinje i Eko-centru „GS“ iz Špionice. – Želja nam je da što više podstičemo kako privredne



Najbolje dvorište ima OŠ Podorašje

subjekte tako i ostalo stanovništvo da se što više pozabave ovom tematikom, tačnije da što više obraćaju pažnju na svoja dvorišta i avlije. Ove godine se prijavilo 30 kandidata, iako smo očekivali znatno više, kazao je Osman Gavranović, predsjednik udruženja „Eko-zeleni“ Srebrenik. U okviru svečanosti održana je i javna tribina, na kojoj je o ekološkim problemima na području srebreničke općine govorio Osman Gavranović, predsjednik Ekološkog društva „Eko zeleni“ Srebrenik. Predstavljene su i ekološke kabine za početno razdvajanje komunalnog otpada srebreničkog inovatora Abdulaha Smajlovića, čija bi primjena, kako je rečeno, znatno doprinijela očuvanju čovjekove životne sredine.



Za poseban doprinos nagrada je dodijeljena i Tursunović Almiru iz Tinje

Maturanti MSŠ Srebrenik proslavili maturu



Defile maturanata MSŠ Srebrenik

U skladu sa tradicijom, koja traje posljednjih nekoliko godina, dana 22.05.2010.godine u 19 sati, ulicama Srebrenika, prodefilovali su svi maturanti Mješovite srednje škole Srebrenik. Praćeni od strane preko hiljadu Srebreničana i gostiju sa strane, maturanti su se, visoko uzdignuta čela, dostojanstvenim hodom i u prelijepim haljinama i odijelima, predvođeni svojim razrednim starješinama, nakon prolaska pored Prve osnovne škole te svečanog defilea gradskim šetalištem, okupili ispred Centralnog spomen-obilježja poginulim u ratu 1992-1995.g. na Trgu Alije Izetbegovića, gdje je priređen prigodan program. Maturantima se prvo obratio direktor MSŠ Srebrenik Sumedin Nišić, koji je izjavio da se nada da će i ovi mladići i djevojke, kao i oni prethodnih generacija, dostojno reprezentovati svoju školu i Općinu Srebrenik tokom daljnog školovanja ili tokom rada,

zaželivši im puno uspjeha i sreće u narednom periodu. Prisutnima se obratila i Vikalo Safija, učenica generacije MSŠ Srebrenik, koja je ukratko predstavila svoje viđenje proteklog perioda školovanja te se zahvalila profesorima i kolegama i kolegicama, koji su joj pomogli da u nastavnim i vannastavnim aktivnostima postigne mjerljive rezultate, koji su i doprinijeli da postane učenica generacije. U nastavku programa maturanti su, do 2 sata rano ujutro, bez većih ekscesa, nastavili prigodno druženje u Motelu «Park» Srebrenik, uz bogatu trpezu i prigodni muzički program, a nakon toga i u brojnim srebreničkim kafićima.



Vikalo Safija učenica generacije MSŠ Srebrenik školske 2010/2011

Srebrenički osnovci na Kids festivalu

Predstavnici učenika svih osnovnih škola sa područja Općine Srebrenik su, na inicijativu Policijske stanice Srebrenik a pod pokroviteljstvom/sponzorstvom načelnika Općine Srebrenik, dana 13. juna 2011.godine, uz pratnju predstavnika Policijske stanice Srebrenik, putovali u Sarajevosportski centar "Zetra", gdje se održavao 8. Tradicionalni međunarodni "Kid's festival". Kid's festival je najveći nezavisni događaj za djecu i mlade u

jugoistočnoj Europi. Festivalu prisustvuje preko 40.000 djece iz svih krajeva BiH. To je kulturna manifestacija odnosno veoma veliki projekat kojem se raduju djeca iz cijele BiH, a stotine pisama koja su upućena organizatoru, pokazuju koliko su djeca uživala u svom posjetu Kid's festivalu, dok je za neke to bio i "najbolji dan u životu". Uz veoma veliki broj edukativno - zabavnih radionica, performansa i animacija, djeci se prikazuju i velika filmska ostvarenja među kojima su BiH i evropske premijere. Obzirom da se radi o programski najbogatijoj i po posjećenosti najvećoj manifestaciji ove vrste, Kid's festival je već sada pronašao svoje mjesto u paleti svjetskih festivala. Ogroman uspjeh KF-a je rezultat jedinstvene kombinacije edukacije i zabave koja kroz igru gradi povjerenje među desetinama mladih BiH. Treba napomenuti da je ovu manifestaciju za učenike sa područja Srebrenika finansijski podržao i privrednik



Učesnici festivala



Detalj sa Kids festivala

Ordagić Mirza (DOO „Ordagić“ Srebrenik) kupovinom sokova i slatkiša za učenike, priredivši im na taj način veoma prijatno iznenađenje.



Vođe puta na Kids festivalu

Trocahero pobjednik Radničkih sportskih igara Srebrenik



Ekipa Trocadera sa Jašarević Muhamedom

Pobjednik „Radničkih sportskih igara Srebrenik 2011“ u malom nogometu je ekipa „Trocahero“, koja je u finalnom susretu bila bolja od „Textil International company“ sa 2:1. U duelu za treće mjesto „Herceg“ je savladao „Policijsku stanicu Srebrenik“ nakon izvođenja penala, dok je u regularnom toku susreta bilo 1:1. Za najboljeg igrača ovih Igara proglašen je Nedim Okić iz „Vodovoda i kanalizacije“, dok je za „fair play“ ekipu proglašen „Persel“. Na ovogodišnjim Igrama učestvovalo je ukupno 12 ekipa, inače privrednih subjekata sa ovog općinskog područja. Igre su održane u organizaciji JU „Sportsko-rekreativni centar“ Srebrenik, čiji je pokrovitelj bio općinski načelnik Mehmed Bajrektarević. Finalni susret odigran je u okviru obilježavanja 21. juna, Dana općine Srebrenik, a nagrade najboljim pojedincima i ekipama uručio je Muhamed Jašarević, šef Službe za društvene djelatnosti, raseljena i izbjegla lica.

Veliki uspjesi karatista K.K. „Srebrenik“

Na XII internacionalnom karate kupu "TK-a OPEN 2011." koji je održan u Tuzli 26. i 27. 02. 2011. godine zapažen nastup su imali karatisti KK "Srebrenik" Arifović Amir i Suljić Sabina, obzirom da su se oboje okitili zlatnim medaljama. Sabina u kategoriji kate juniorke, a Amir u kategoriji kate juniori. Treba još istaći da je na turniru nastupilo 1400 takmičara iz 9 država. Niska uspjeha ovog karate kluba iz Srebrenika i navedenih takmičara je nastavljen i na 18. Državnom prvenstvu u karateu za kadete, juniore i "U-21" održanom 28. i 29. 05. 2011. godine u Gornjem Vakufu. Učešće na prvenstvu je uzelo 60 klubova iz cijele BiH.



Arifović Amir i Suljić Sabina

Članovi KK "Srebrenik" su osvojili 1 zlatnu i 1 srebrnu medalju. Naime karatista Arifović Amir je postao Državni juniorski prvak u katama, dok je Suljić Sabina osvojila srebrnu medalju u katama u kategoriji "U-21". Pored osvajača medalja za karate klub "Srebrenik" je nastupilo još 3 takmičara, a to su: Salihbašić Arnela, Filipović Josip i Jašarević Amir, koji nažalost ovaj put nisu uspjeli doći do medalje. Čestitke klubu i osvajačima medalja, a ostalima želimo više sreće na narednim prvenstvima.

Veliki uspjeh PS Srebrenik

Službenici PS Srebrenik su na takmičenju, koje je održano povodom obilježavanja 22. maja - Dana policije TK-a, na strelištu Paša Bunar u Tuzli, među 16 ekipa sastavljenih od pripadnika MUP TK-a sa po tri člana, koje su se nadmetale u disciplini - gađanje iz pištolja kalibra 9 mm, sa distance od 25 metara, u kružnu pištoljsku metu, stav-stojeći, osvojili ekipno prvo mjesto, dok je Jusufović Sabin iz PS Srebrenik, osvojio drugo mjesto u pojedinačnom plasmanu. Bio je ovo još jedan u nizu uspjeha policajaca iz Srebrenika na sportskim takmičenjima povodom 22. maja. Za najbolje učesnike je, nakon završetka takmičenja, upriličena dodjela prigodnih pehara i medalja za postignuti uspjeh.



Pobjednička ekipa PS Srebrenik

Košarkaški klub Gradina se zahvalio sponzorima



KK "Gradina" Srebrenik sa upravom

Nakon uspješno okončane debitantske sezone u A1 ligi FBiH, koju su izabranici Adnana Hodžića okončali na petom mjestu, u srebreničkom motelu „Gradina“ rukovodstvo Košarkaškog kluba „Gradina“ organiziralo je malu svečanost. Domaćin ove manifestacije i prvi čovjek K.K. „Gradina“ Srebrenik Mursel Delić, zahvalio se svim prijateljima i sponzorima Kluba, naglasivši da vjeruje kako će oni i u narednoj sezoni biti uz njih, te im biti nesebična podrška. Dodijeljeno je i nekoliko zahvalnica, dok je najveće priznanje dobio član Upravnog odbora Senahid Nurkanović-Buco, vlasnik motela „Evropa“. Priznanja su također dobili bivši i sadašnji načelnici Općine Srebrenik, Osman Suljagić odnosno Mehmed Bajrektarević, dok su svečanost posebno uveličale dvije legende bh. i tuzlanske košarke, Mara Lakić iz K.K. Jedinstvo i Žarko Vujović iz K.K. Sloboda Tuzla.

Gradina-Herceg u Prvoj ligi FBiH



Obojkašice Gradine-Herceg

Na završnom „trokut-turniru“ koji je odigran 17.04. 2011.g. u JU „SRC“ Srebrenik, odbojkašice Gradine-Herceg zajedno sa ekipom Vogošće obezbijedile su plasman u Prvu ligu FBiH. Ove dvije ekipe bile su uspješnije od ekipe Mostara, koja će i u narednoj sezoni biti član drugoligaškog društva. Na turniru u Srebreniku, najviše su pokazale odbojkašice Vogošće, koje su sa 3:2 bile bolje od domaćina, te sa uvjerljivih 3:0 od Mostarki, dok su s druge strane odbojkašice Gradine-Herceg na otvaranju turnira bile bolje od Mostara sa uvjerljivih i sigurnih 3:0, što im je bez obzira na poraz od Vogošće, bilo dovoljno za plasman u prvoligaško društvo. Trener domaće ekipe Elvir Ćudić bio je više nego sretan nakon plasmana u viši rang, te je kazao: - Jako sam sretan i ponosan na moje djevojke koje su pokazale da imaju kvalitet i da zaslužuju plasman u Prvu ligu FBiH. Nadam se da ćemo i u prvoligaškom društvu imati šta pokazati publici, rekao je Ćudić. Prilikom otvaranja turnira, gostima se obratio Edin Herceg, predsjednik ovog odbojkaškog kluba, dok je turnir otvorio predsjedavajući OV-a Srebrenik Ibrahim Zukić, kazavši da je Srebrenik stolni grad u kojem su stolovali kraljevi i pisali svojevrsnu historiju, ali da se već nekoliko godina u Srebreniku također piše i uspješna sportska historija.

KK „Brčko DC“ pobjednik turnira „SilverBall 2011“

Dana 29.05.2011. godine u Srebreniku je odigran košarkaški turnir „SilverBall 2011“ u konkurenciji dječaka generacije 1998. i mlađi. Organizator turnira je bila Škola sporta „Silver Kings“ i ovo je nastavak dugogodišnje tradicije koja je 2009 i 2010. godine bila privremeno prekinuta. Učešće su uzeli pored domaćina Škole sporta Silver Kings, KK Brčko DC, KK Lions Tuzla i KK Twisters Tuzla. U prvoj utakmici sastali su se Kingsi i Brčko DC gdje su pobjedu odnijeli gostujući košarkaši. U drugom susretu Lionsi su bili bolji od sugrađana Twistersa. Treće mjesto je osvojila ekipa Twistersa tijesnom pobjedom nad domaćinom a u finalu Brčko DC je slavio protiv tuzlanskih Lavova. Organizacija turnira je bila na visokom nivou, bez ijednog nesportskog poteza. Svi učesnici turnira imali su besplatan obrok i nadamo se da će ovaj turnir već naredne godine vratiti međunarodni karakter. Sa ovime je ujedno završena sezona 2010/2011. Košarkaši Silver Kingsa su u Ligi mladih RKS Tuzla zauzeli 6. mjesto u konkurenciji 11 ekipa. Pripreme za narednu sezonu su već krenule a naši kadeti su već najavili borbu za jedno od prva tri mjesta naredne sezone dok pionirima predstoje paklene ljetne pripreme.



KK "Brčko DC"